



## SAKSPAPIR

Saksnr	Utval	Type	Dato
11/2022	Bygdeutviklingsutvalet	PS	19.04.2022

Sakshandsamar	Arkiv	ArkivsakID
Tore Henrik Øye	FE-223	22/320

### HANDSAMING AV SØKNAD OM BYGDEUTVIKLINGSMIDLAR TIL Å GJERE "BRØRVIKSKUTO" SJØDYKTIG ATT - KOLFYRPROSJEKTET

#### Vedlegg:

Søknad om bygdeutviklingsmidlar - Kolfyrprosjektet - å gjera "Brørvikskuto" sjødyktig att  
Budsjett\_kolfyr

Ettersending av informasjon om bruk av "Brørvikskuto" til aktivitetar - søknadsgrunnlag BUU

#### Kommunedirektøren sitt framlegg til vedtak:

Stiftinga Brørvikskuto, v/ styreleiar Anne Mari Hannisdal, får tildelt inntil kr. 100 000,- i tilskot til reparasjonsarbeid for å gjere "Brørvikskuto" sjødyktig att. Løyvinga utgjer 25 % av budsjetterte kostnadar på kr. 410 480,-.

Vedtaket er fatta med bakgrunn i «Retningsliner for tilskot til bygdeutvikling». Løyvinga skal takast frå Bygdeutviklingsutvalet sine tilgjengelege midlar for 2022.

Vilkåret for løyvinga er at "Brørvikskuto" vert nytta til kulturformidling gjennom prosjekt, tiltak og samlingar som involverer ålmenta.

Løyvinga vert betalt ut etter kostnadsdokumentasjon. Løyvinga gjeld ut 2023. Etter dette vert midlane trekte inne att. Det kan søkjast om utsetjing.

#### Bygdeutviklingsutvalet - Sak 11/2022

#### BYG - Behandling:

Utvalet drøfta saka.

Kommunedirektøren sitt framlegg til vedtak vart samrøystes vedteke.

#### BYG - Tilråding/Vedtak:

Stiftinga Brørvikskuto, v/ styreleiar Anne Mari Hannisdal, får tildelt inntil kr. 100 000,- i tilskot til reparasjonsarbeid for å gjere "Brørvikskuto" sjødyktig att. Løyvinga utgjer 25 % av budsjetterte

kostnadar på kr. 410 480,-.

Vedtaket er fatta med bakgrunn i «Retningsliner for tilskot til bygdeutvikling». Løyvinga skal takast frå Bygdeutviklingsutvalet sine tilgjengelege midlar for 2022.

Vilkåret for løyvinga er at “Brørvikskuto” vert nytta til kulturformidling gjennom prosjekt, tiltak og samlingar som involverer ålmenta.

Løyvinga vert betalt ut etter kostnadsdokumentasjon. Løyvinga gjeld ut 2023. Etter dette vert midlane trekte inne att. Det kan søkjast om utsetjing.

### **Saksopplysningar:**

#### **Samandrag/konklusjon (kort om saka)**

Bygdeutviklingsutvalet har kr. 500 000,- i tilskotsmidlar til fordeling etter søknad i 2022.

Stiftinga Brørvikskuto søkjer om kr. 100 000,- i bygdeutviklingsmidlar til reparasjonsarbeid for å gjere “Brørvikskuto” sjødyktig att. Skuta skal nytast til kulturformidling, speiselt ovanfor born og unge, etter at ho er kome på sjøen.

Reparasjonsarbeidet er kostnadsrekna til kr. 401 480,- (faktiske utgifter + verdien av dugnadsarbeid).

Søknaden om tilskot utgjer ¼ av kostnaden.

Med bakgrunn i at “Brørvikskuto” skal nyttast til å involvere ålmenta på ulike måtar, finn Kommune-direktøren at søknaden er i samsvar med føremålet som bygdeutviklingsmidlane skal fremja.

Kommunedirektøren går inn for å løyve inntil kr. 100 000,- i tilskot til reparasjonsarbeidet, i tråd med søknaden frå Stiftinga Brørvikskuto.

#### **Bakgrunn for saka**

Bygdeutviklingsutvalet forvaltar ei tilskotsordning for å fremje bygdeutvikling i kommunen, med inntil kr. 500 000,- til fordeling mellom søkjarar i 2022.

I søknad av 03.03.22 søkjer Stiftinga Brørvikskuto, v/ Anne Mari Hannisdal og Oddvar Bukkestein, om kr. 100 000,- i bygdeutviklingsmidlar for å gjere “Brørvikskuto” sjødyktig att (reparasjonsarbeid).

Det går fram av søknaden at “Brørvikskuto” er ei 40 fot lang jekt, heimehøyrande på Stamnes. Jekta er av ein type som var vanleg i indre strøk av Nordhordland, og den er soleis historisk, representativ for området.

I følgje søkjar vart “Brørvikskuto”, som den einasta i sitt slag, sjøsett og drifta av veneforeininga

Skutefolket, kvart år i perioden 2002 -2020. Dette vart gjort gjennom ei omfattande kulturformidling, spesielt retta mot born og unge. I tillegg har skuta promotert stamnesbygda og heimkommunen, mellom anna gjennom deltaking på festivalar og innslag i "Norge Rundt". Skuta har òg fungert som ein lokal identitetsskapar.

Ved klargjering av "Brørvikskuto" for sjøsetting etter pandemien, vart det avdekka soppangrep som gjorde at ho ikkje kunne setjast på sjøen før reparasjon er gjennomført. Medlemar av "Skutefolket" har difor sett i gong ei omfattande vøling på dugnad, etter rettleiing frå kunnig tradisjonsbåtbyggjar.

Intensjonen er å få "Brørvikskuto" på sjøen att i 2023, med mål om aktiv bruk og kulturformidling. I denne samanheng ligg følgjande planar føre:

- Stiftinga og "Skutefolket" vil ta opp att det årlege samarbeidet med Lyngheisenteret på Lygra, der skuleklassar får lære om skuta og sjømannskap, og å vere med på å sigla og ro.
- Det er òg planar om å ta opp att samarbeidet med kyrkja i Vaksdal kommune, der born får vere med skuta i Veafjorden, med landgang på Kvamsholmen for grilling og andre aktivitetar.
- I tillegg er tanken å ta opp att samarbeidet med Stamnes kultur dagar/Fiskefestivalen, der både born og vaksne får vere med - og fiske frå - "Brørvikskuto".
- Stiftinga og "Skutefolket" er elles innstilt på andre opplegg i lokalmiljøet, og alltid opne for forslag.
- Skuta vil dessutan halde fram med å delta på tilstellingar andre stader, som på Torgdag,

Nordsteam, Hansadagane og Sandsviksdagane i Bergen, og kystsogedagar og råsegl-seminar i regi av Forbundet Kysten.

Restaureringsarbeidet fører med seg ein del utgifter, og for å nå målet om sjøsetting, vert det søkt om delfinansiering frå Bygdeutviklingsutvalet.

Vedlagt oppsett for faktiske kostnader, viser følgjande:

- Kostnader per 1. mars 2022 : kr. 18 100,-
- Kostnader som står att : kr. 143 380,-
- SUM : kr 161 480

Verdien av eige arbeid/dugnadsarbeid, er rekna til:

- Gjennomført arbeid (465 t , a kr 250,-) : kr. 116 220,-
- Attståande arbeid (495 t, a kr 250,-/t) : kr. 123 750,-
- SUM : kr. 240 000,-

Total kostnad (utgifter + dugnad) er kostnadsrekna til kr. 401 480-. Nærare spesifisering går fram av vedlegg.

Med bakgrunn i kostnadsoverslaget utgjer søknaden om kr. 100 000,- i tilskot, 62 % av faktiske kostnader og 25 % av totale kostnader (inkludert dugnad).

## Formelt grunnlag

- Kommunelova - generelle sakshandsamingsreglar.
- Retningslinjer for tildeling av midlar frå Bygdeutviklingsutvalet”, vedtekne 26.05.20:

<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

## Vurdering og konsekvensar

Søknaden om tilskot til vøling av «Brørvikskuto» innfrir tilskotsordninga sine retningslinjer om krav til innhald, og kven som kan søkje om midlar (mellom anna lag/organisasjonar).

I følge retningslinjene skal bygdeutviklingsmidlane vere til ålmenn nytte, og stimulere til levande bygdeliv, mellom anna i form av ulike prosjekt, arrangement og møteplassar. Midlane skal kome mange til gode, skape trivnad og medverke til aktivitet som er tilgjengeleg for «alle». I dette høvet vart det på strategimøtet i Bygdeutviklingsutvalet den 8. mars, semje om å leggje spesiell vekt på aktivitetsfremjande tiltak og prosjekt.

Vølinga av «Brørvikskuto» skapar ikkje aktivitet i seg sjølv, men gjev grunnlag for framtidig aktivitets- og opplevingstilbod, med lokal historie- og kulturformidling. I dette høvet har søkjar konkrete mål om å nytte skuta aktivt, mellom anna i opplæringssamanheng ovanfor den yngre generasjonen. Planane som ligg føre, er mange og varierte.

Kommunedirektøren ser på praktisk bruk av «Brørvikskuto», med involvering av ålmenta, som avgjerande for å kunne gje tilskot til reparasjonsarbeidet. Den store dugnadsinnsatsen for å vøle skuta, er prisverdig og verdfull i seg sjølv, gjennom vidareføring av tradisjonshandverk og båtbyggjarkunst. Men sjølve arbeidet fell likevel utanfor føremålet med bygdeutviklingsmidlane, etter Kommunedirektøren si vurdering. Planane om framtidige tiltak, gjev derimot grunnlag for å løyve midlar.

Bygdeutviklingsmidlane sine retningslinjer seier at det skal takast omsyn til geografisk fordeling ved bruk av midlane, og om bygder har fått tilskot ved tidlegare høve. Det er gjeve midlar til fleire tiltak kring Stamnes, men ikkje av liknande karakter. Tidlegare løyvingar vert ikkje vesentleg vektlagt ved handsaming av søknaden.

Kommunedirektøren går inn for å løyve inntil kr. 100 000,- til reparasjonen av «Brørvikskuto». Utbetaling vert gjort etter kostnadsdokumentasjon.